


# Gazetta da Scuola

2 / 2020  
gün, 5. annada

chad

coronavirus

Sun ün vitus,  
Ami da daftaid...  
Meis halm es coronavirus



-Fu plasch schilit

Plaschasch amai? NA. ☹



**cumponimaint - Tavla classa**

Il virus da corona ha müdà il minchadi da minchün. Daspö ils traidesch marz nun es plü nöglia normal, impustüt na illa società. Cur chi's va our da chasa as sainta sco schi's fess alch cunter la ledscha e cur chi s'inscuntra ad inchün as stoja tgnair aint üna distanza da sgürezza, sco schi's vess temma da quella persuna. Per tuot ils giuvenils ed uffants da l'Europa s'ha müdà il minchadi. Els nu pon plü s'inscuntrar ed ils giuvenils nu pon plü ir a far festa insembel. Tras quistas limitaziuns poja eir dar cha pro uffants, giuvenils e genituors chi vivan di per di ill'istessa chasa, ardan tras las sgüranzas e ch'els croudin in üna foura psichica. Per mai s'ha eir müdà bler, ma eu nu'm fetsch amo dumondas existenzialas. Eu fetsch d'ürant l'eivna istess scoula, ma illa fuorma speciala sün distanza «distance learning». Davo la scoula vegna bler a trenar sül velo, a cuorror o eir culs bastuns. Id es tuot curius a trenar adüna tuot sulet, sainza ils oters atlets ed il trainer. Sco ch'eu n'ha fingià quintà, fetsch eu scoula sün distanza. Ils avantags dal «E-learning» sun tenor mai, la quantità da lecziuns e la sfida cha no vain gnü dad ir intuorn culs möds d'instrucziun. Tras la sfida vaina gnü üna schanza, dad imprendar robas novas e da far novas experienzas. Ma i dà eir dischavantags, sco per exaimpel la quantità da quai cha nus imprendain, quella nun es plü uschè ota o ch'eu nu poss plü m'inscuntrar cun meis amis. Ün grond dischavantag es il virus per l'economia. L'economia naziunala ha fat i' l' ultim temp perditas enormas. Ma eir blers affars, impustüt independets, han da far avuonda da na ir in fallimaint. Il motiv per quists dons immens es il «lock down», quai vuol dir cha'ls possessurs dals affars han amo adüna da pajar pajas, ma perquai ch'els nu pon plü far ingün schmerdsch, nu fana ingün guadogn. Experts suppuonan però, cha i' l' avegnir, cur cha la crisa da corona es passada, as remettaran ils marchats darcheu. l'avegnir daraja eir amo oters aspets positifs. Ün da quels aspets positifs es, cha tras il scumond da passar ils cunfins, nu svoulan bod plü ingüns aviuns e l'ajer nu vain impli cun uschè bler dioxit carbonic. Eu speresch cha nus imprendan alch our da quista situaziun per l'avegnir e chi detta ün müdamaint dal pensar da tuots. Ma nus nu vain dad invlidar las consequenzas negativas cha quista

pandemia ha chaschunà, tuot ils morts e tuot la dolor per lur strets conumans. Eu condolesch da cour a tuot las famiglias chi han pers ad üna persuna tras il COVID-19. Our da quista pandemia pudaina tour cun no blera roba per l'avegnir. Eu speresch cha i' l' futur tgnarana aint ün pêr da las masüras igienicas, eir schi nu dà ün virus chi va intuorn. Eu speresch eir chi gnia scumandà da vender sün marchats bes-chas vivaintas, perquai cha là es il contact tanter la bes-cha e l'uman fich grond ed ils virus pon siglir facilmaing da la bes-cha sül uman. Ma sco cha nus vain constatà i'ls ultims vainch ons, nu sarà quist stat l'ultima pandemia, culla quala l'umanità varà da cumbatter. Eu craj cha no hajan da müdar in ün möd nos stil da vita, per chi nu detta pro'l prossem virus darcheu uschè üna gronda catastrofa da l'economia. Ed eu craj cha no hajan da tour fich serius las masüras cha'l Cussagl federal ed il "BAG" han miss sü per quist temp difficil. Eu speresch cha plü blers pussibel, da quels chi sun infettats gnian darcheu frischs. E per finir sperescha cha l'umanità imprendad alch our da tuot quist!

**chartas - 4a classa**

Charas conscolaras e chars conscolars  
Pro no esa vairamaing uschè cha no fain a bunura las lezchas e davomezdi giouva cun mia sour. Ma minchatant legiain no eir o giain sün nos trampolin. Als 20 marz eschan



no its giò Panas-ch Sura a verer ranas. Las ranas d'eiran amo ün pa plufrettas. Per mai esa schon ün pa curius ch'eu nu poss ir vi pro nona e bazegner, perche ch'eu vegn ter bler vi pro els. Meis bazegner ha gnü als 21 marz anniversari, ma no nu vain pudü festagiar culla famiglia precis sco pro mia sour. Ella vaiva als 25 marz anniversari, ma no vain fat il meglter landroura. Eu n'ha regalà ad ella per l'anniversari culurs per pitturar sün crappa. No vain eir pitturà bler sülla crappa. Ils lündeschdis n'ha eu adüna lecziuns da clavazin sur Skype cun sar Oscar. In sonda vain no cusi leivrinas da Pasqua cun mamma e vain fat Handlettering. In dumengia n'ha eu guardà cun mamma e bap il film Ice Age. Per mai esa schon ün pa pluffer da na pudair ir a scoula perche ch'eu fetsch ün pain daplü dispitta cun mia sour. Chars salüds

Charas conscolaras e chars conscolars  
Eu speresch cha vo sajat frischs e sans e cha vo nun hajat massa lungurus. A mai para quista situaziun propcha curiosa e plufra. Prüma ch'eu nu vez plü a vo, seguonda chi nun es bod ingüna glied in cumün, bod tuots stan be a chasa e terza schi's fa giò as stoja tgnair adüna duos meters distanza schi's po insomma far giò. E co es quai pro vo? Co as sentivat vo cun quista situaziun? Eu speresch chi giaja tuot bain cun vo. Per mai esa fich curius da far lezchas a chasa perquai ch'i'd es sul quiet ed eu am saint tuot sulet ed id es sul greiv



da'm concentrar schi'd es uschè quiet, e co esa per vo?  
Eu fetsch però eir bler oter tanteraint. Siglir sül trampolin, ir a verer ils stizis dal castor, ir cul velo, ir a porta samada e bainbod poss eu ir a pes-char cun mia mamma. E che faivat vo uschè per far passar il temp? Tschel di esa gnü adimaint ch'eu pudess far mia festina d'anniversari, però lura esa gnü adimaint ch'eu nu tilla poss far pervi dal virus. Però cur ch'i'd es a fin fetsch eu quella e quai inandret. Eu speresch cha quist saja bod a fin e m'allegr da's verer, restai frischs e sans. Chars salüds

Charas conscolaras e chars conscolars  
Eu n'ha badà ch'eu n'ha plü lungurus co uschigliö. Ma intant ch'eu n'ha da far alch (lezchas, cuschinar...) vaja amo bain a tegner oura. A mai manca ün pa da far giò. Da nun ir a scoula es ün pa sco vacanzas cun lezchas. No vain a nona in chasa, quai vuol dir cha no stuvain ir a cumprar aint per ella. Mia sour ed eu fain bler insembel, uschè eschna gnüts süll'idea dad imbellir ün toc üert. Da far lezchas a chasa es ün pa curius, ma i va. Chars salüds

Charas conscolaras e chars conscolars  
No d'eiran desch dis in quarantena, perche cha meis bap es gnü testà positiv sün Covid19. Eu cumainz cullas lezchas e davo vegna ün pa oura. Nö ir pro nona es schon greiv. Cun quai ch'ella ha fingià 92 ons nu's saja mai quant lönch ch'ella viva amo. Eu comunichesch cun oters cun telefonar e tras Skype. Da nö ir a scoula es special perche ch'eu nu vez ün pêr conscolars e nu vez la magistra. Nossa famiglia sarà immuna. Far a chasa scoula es tuot lustig ed i's po durmir plü lönch. Eu am dumond quant lönch cha quist virus va amo intuorn?  
Chars salüds



Charas conscolaras e chars conscolars  
Mia famiglia ed eu vain passantà blera roba insembel. Co vaja a vo ed a vossa famiglia? Co vaja a vossas bes-chas chasanas? Avant ün pêr dis n'haja imprais a giovar a jass, quai d'eira fich cool. Eu n'ha eir fat sport e giovà cun meis fradgliuns. A mai para il virus da corona fich pluffer. Co para a vo il virus da corona?  
Chars salüds

**intervistas - scolaras e scolars**

Co d'eira teis prüm sentimaint davo ch'i'd es gnü cuntshaint cha las scoulas ston serrar per temp indefini?  

- Eu am daiva da buonder co chi sarà da fa scoula cun novas metodas d'imprender, eu nu d'eira propcha cuntaint, ma neir na grit da quella decisiun.
- Dad üna vart d'eira cuntaint, da tschella vart eir ün pa trist e quai impustüt pervia da la cumpagnia.
- Stupend – liber!
- Che pluffer, star be sulet a chasa!

Co hast tü passantà il temp bod adüna be a chasa?  

- Il bler vegn eu a far üna spassegiada cun mia mamma.
- Bain, il bler n'haja giovà cun mia Play Station e sun i bler cul velo.
- Eu n'ha fat lezchas e n'ha eir cuschinà suvent cur cha meis genituors vaivan da lavurar.
- Eu n'ha eir fat musica, perquai ch'eu vaiva eir uras da guitarra sur skype.
- Per mai d'eira quist temp sul lungurus e stantus.
- Quist temp e quista situaziun es plufra, ella ha ruot blera roba.

Co sun pro vo organisadas las lecziuns?  

- Mincha lündeschdi vegna pel material in scoula per pudair lura lavurar tuott'eivna landervia.
- Eu n'ha scoula online sur TEAMS, là vezza a meis magister ed eir a meis conscolars e no fain vairamaing insembel scoula, però minchün pro sai a chasa. Eu tschüf eir lezchas pel prossem di. Minchatant faina perfin eir lavurs in gruppa.
- Il bler es mia mamma chi'm güda, ella cloma a mai e lura lavur eu sülla maisa in stüva.
- Vairamaing fetsch eu las lezchas cur ch'eu n'ha vögliia, il bler fetsch eu al davomezdi o cur cha mamma disch da far.

Esa greiv dad organisar sves la scoula sainza magistra o magister chi controlla tuot?

- Vairamaing nögliia, perquai ch'eu n'ha a mia mamma chi'm güda, e lura funcziuna tuot bain sco a scoula.
- Na, eu chat ch'i'd es bler plü simpel, perquai ch'eu poss lavurar in meis agen tempo e nu stögl adüna spettar cha tschels scolars hajan fat per ch'eu poss lavurar inavant.

Co es quai per tai da lavurar 'online'?

- Il cumanzamaint d'eira ün pa curius, ma uossa giaiva adüna meglder.
- Id es curius dad esser davant il computer a far scoula.
- A mai nu para quai uschè flot, perquai chi s'es bod tuotta di be vi dal computer.
- Planet m'adüs eu landervia, eu n'ha però schon badà chi'd es meglder dad ir a scoula tuot normal perquai cha fond tuotta di scoula sur il computer e davo amo lezchas vi dal computer tschüffa mal il cheu.

Daja robas positivas vi da quista situaziun?

- Üna roba positiva es cha no pudain star sü ün pa plü tard la bunura.
- Chi nu's sto ir mincha bunura cul bus.
- Tras quist möd da far scoula imprendaina ad ir intuorn bler meglder culs computers.
- Nos urari es gnü adattà ed uschè nu vaina tuot las lecziuns scoula.
- Eu n'ha daplü temp per leger, ir oura in via, disegnar ed i s'ha daplü temp ün per tschel.

Che sun las robas negativas da la scoula sün distanza?


- La roba la plü negativa es chi mancan ils cumpogns, la classa.
- Schi nu s'inclegia alch schi nu's poja simplamaing subit dumandar davo.
- Massa bler computer.

Chattast meglder da far scoula sur l'internet o a scoula?

- A mai plascha plü bain la scoula 'online'.
- Eu chat quist möd da far scoula sün distanza amo bun, perquai ch'eu riv da'm concentrar meglder ed impustüt nu perdaina uschè massa bleras lecziuns.
- Per mai esa greiv a lavurar be sulet perquai vegna plü jent a scoula.

Vaivast tü previs da far robas cha tü nu poust uossa far pervi dal virus?

- Eu vaiva avant dad ir in vacanzas, ma quai nun es uschè mal scha quai nun es pussibel. Però eu speresch fich cha mia Confirmaziun ed almain eir il viadi da scoula possan istess gnir fats, uschinà füss eu fich trista.
- Per no da la nouvavla classa es tuot ün pa plü mal, nos ultim Chalandamarz nu vaina pudü far, la Confirmaziun es gnüda spostada, il viadi da finischun es intschert e chi sa co chi giarà cul cumanzamaint dal giarsunadi.



## intervistas

### Co e che instruischa Ella pel mumaint in scoulina?

Eu fetsch pront ün urari da l'eivna, sün quel esa per mincha di üna lezcha adattada pels uffants da scoulina. Per exaimpel chantar üna chanzun cun agüd d'ün audio, o far alchin da zambriar o gimnastica....Eu fetsch pront tas-chas cul material e tillas met dador scoulina. Là vegnan ils genituors üna jada l'eivna per davo. A mai manca però fich il contact culs uffants e la lavur in scoulina.

### Per che s'allegra Ella il plü ferm cur ch'Ella ha ils uffants darcheu in scoulina?

Fingia la dumonda es fich allegraivla ed am fa trar aint plü profuond il flà. Eu m'allegri impustüt pels inscunters persunals, pellas fatschinas e pels ögls chi guardan aint per mai. Eu m'allegri da tadar las istorgias chi quintan... e da tuornar plan planin darcheu inavo aint il minchadi da scoulina.

### Co declera El la matematica be sur telefon o video? Che sun las difficultats?

Cun quai cha'ls scolars da 1. e 2. classa nun han ün account da l'Office 365 nun esa pussibel da far ün'instrucziun live sur Teams. Tematicas novas introduj eu perquai uschè, ch'eu tramet als uffants ün film, ingio ch'eu muoss ad els co cha'ls quints funcziunan. La gronda difficultà es quella, ch'eu nu sa scha tuot ils uffants inclegian propcha quai ch'eu decler e sch'els sun buns da far las lezchas. Ma fin uossa ha quai funcziunà fich bain.

### Co güdichescha Ella che cha uffants da 3.-4. classa sun buns da far a chasa?

Tenor mai nun es il cuntgü da las lezchas cha'ls uffants han da far a chasa il plü important, i's tratta da formular e dar lezchas cha'ls uffants pon far eir a chasa. Eir d'ürant il temp da scoula sün distanza n'haja pudü cuntinuar culs cuntgnüts ch'eu vess tematisà eir scha la scoula vess cuntinuà in möd üsità. Natürmaing esa da resguardar cha'ls uffants nun han tuot il material e las pussibilitats ch'els vessan sch'els lavuressan in scoula. Plü important co'l cuntgnü da las lezchas es tenor mai il möd da declerar las incumbenzas cha'ls scolars e las scolaras han da far a chasa. Cun dar üna lezcha, prova da tilla formular plü simpel e plü inclegiantavel pussibel per cha'ls uffants rivan da far las

lezchas eir sainza meis sustegn. Implü am esa important da redüer la quantità da las lezchas, vuol dir cha'ls scolars nun hajan da far tuot las lezchas e las incumbenzas ch'els vessan gnü da far sch'els pudessan gnir tuot normal a scoula. Quai causa cha'l leger e l'incleger la decleraziun d'üna lezcha dvaintan in üna jada üna bler plü gronda sfida, causa chi manca il contact direct culla magistra o cul magister.

### Co fa Ella pro l'instrucziun a distanza cullas correcturas pels scolars?


Ils scolars vegnan mincha lündeschdi a tour las lezchas da l'eivna. Là am dan els eir güsta giò lezchas da l'eivna avant ch'eu correg o ch'eu dun ün sguard, perche cha per part dun eu eir cun els las soluziuns chi pon güsta correger. Els m'han eir fingià tramiss per e-mail o fat üna fotografia cun ün text ch'eu n'ha corret e tramiss inavo per scriver in net. Minchatant guarda eir cul singul scolar üna o tschella correctura cur ch'el vain a tour las lezchas.

### Che metodos ha El per instruir sur il computer?

Eu lavur la gronda part sur Teams culs scolars. Davent da las 9:00 fin las 11:15 n'haja lecziuns culs scolars. Las 11:15 duna incumbenzas cha'ls scolars ston far sur mezdi. Davomezdi n'haja darcheu lecziuns sur Teams. Uschè lavura culs scolars mincha di oter co'l marcurdi, là esa be la bunura.

### Co lavura Ella d'ürant quist temp sco pedagoga curativa culs uffants? Co declera Ella als uffants las incumbenzas per chi inclegian?

Eu lavur cun conferenzas da video. In matematica declera la materia sco in scoula, no discurren insembel ed els pon far directamaing dumondas. Bleras lezchas faina insembel. Quai va bain pervi ch'eu n'ha be 2-4 scolars al listess mumaint. Uschè possa far inavant culla materia, quai vuol dir ch'els impredan roba nova e nu fan be exercizis da repetiziun. Quai am para important. Els survegnan be cuortas e simplas lezchas per far sulets e no tillas corregein subit. No impizain tuots la camera. I fa bain als scolars da verer a lur conscolars in quist temp isolà. No lavurain cul cudesch e quaderns da matematica. In lingua legiaina ün cudesch ch'els han a chasa. Ün davo tschel sto leger avant. No



f a i n  
fögl da la-  
cumünaivelmaing.  
Lezchas nu dun eu. No lavurain in quel mumaint intensivamaing. Els survegnan dal magister da classa o magisters da rom amo lezchas avuonda (NUS, disegn...). Eu sves lavur davent da chasa. Eu n'ha tut il material ch'eu douvr pro mai a chasa. L'avantag per mai es, ch'eu nun ha adüna da viagar cun l'auto e müdar las stanzas da scoula e chasas da scoula. Eu craj cha'ls uffants giodan il contact direct cun mai, no pudain eir discorrer sur dad otra roba co scoula e quai para a mai eir important.

### Dà Ella eir incumbenzas ingio cha'ls uffants ston bandunar lur lö da lavur e scha schi, chenünas?

Eu n'ha provà d'integrar eir lezchas chi nu's sto schogliar be vi dal pult. Quellas as pudaiva per part far eir a chasa, ma il böt es stat cha'ls uffants hajan movimaint o ün müdamaint dal möd da lavur. Ün pèr exaimpels sun: 1. Crear üna scultura fich gronda cun material da riciclagi. 2. Metter sü ün percours our il liber, exercitar e filmar. 3. Inventar ün accumpagnamaint per üna chanzun (cul corp o ogets chi's po dovrar sco instrumaints). 4. Far ün smoothie e scriver la ricetta per inglais. 5. Cuschinar alch ed analizar la derivanza da las ingredienzas e quant sanas cha quellas sun. Ultra da quai han las magistras da rom dat amo lezchas chi's staiva far our il liber per exaimpel observar ün lö e til descriver minch'eivna, ir per manzinas e far ün gnieu da Pasqua, obain implantar roba per l'üert da scoula sco eir cultivar ed observar co cha quai crescha.

### Co esa per Ella a dar scoula sainza las reacziuns o emeziuns dals scolars?

Quai es üna grondischma differenza. Id es interessant a provar oura üna jada il dar scoula sün distanza, ma per adüna nu füss

quai bun. I manca il contact direct culs scolars/as, i nu's vezza a man da la mimica schi han inclet las incumbenzas o co chi tils va in general (quai cha inschinà capita subit cur chi vegnan aint). Quella part es normalmaing importanta. Implü mancan eir quels discuors spontans davo o avant las lecziuns.

### Che es per Ella la plü gronda difficultà ad instruir sün distanza?

Per mai esa üna sfida ill'instrucziun a distanza da badair quant cha'ls scolars han inclet ed ingio ch'els as rechattan i'l process d'imprender. Il rebomb persunal cun mimica, expressiun, tenuta e gesticulaziun manca. Implü nu s'esa uschè flexibel illas lecziuns online ed id es minchatant greiv da reagir adequatamaing sün difficultats da scolars. Impustüt illa matematica am para üna sfida dad incleger subit il problem dals uffants, sch'els decleran lur difficultats sur telefon. L'instrucziun a distanza pretenda üna preparaziun fich detagliada. Ma i nun es facil da valütar quant lösch cha'ls uffants douvrin per incleger e far las incumbenzas. In general n'haja però fat fin uossa fich bunas experienzas cun quist möd d'instrucziun, adonta d'üna o tschella sfida. Eu pens cha quist temp nun es ne per nus magisters, ne pels giuvenils simpel, ma sgüra eir üna gronda schanza.

### Co s'ha müdada la preparaziun e l'instrucziun per Ella? Daja daplü o damain lavur?

Daplü o damain lavur? Quai am para greiv güdichar. Sgüra üna preparaziun differenta e cun otras sfidas: preparar lavurs cha'ls scolars pon far sulets sainza dovrar massa bler agüd, tuot sto esser per minchün singul e per far a chasa, plü o main ingünas discussiuns (oter co online) ed il scolars ston lavurar sainza ch'eu vez co chi lavuran! In quist mumaint esa dumandà sincerità, independenza e blera disciplina da mincha scolar e sgüra eir dals magisters (tenor mai magari pretenius). Per mai s'ha müdada l'instrucziun eir in quel sen ch'eu am saint amo plü dalötsch dals scolars co inschinà eir fingià cun dar be duos davomezdis scoula, vuol dir plütöst in möd negativ. Però sgüra s'haja eir müdà in ün möd positiv, cun gnir our dal «trot» e stuvair stübgjar da nouv co dar scoula. La controlla da lavurs cun trametter fotografias es per mai statta fich pratica per pudair controllar a chasa d'ürant ün mumaint ch'eu n'ha temp. Alch ch'eu am sa metter avant da dovrar eir in avegnir. In quel sen, istess co e che chi s'ha müdà e schi ha dat minchatant daplü lavur o eir damain, s'haja sgüra pudü far bunas e noschas experienzas. Eu improvarà da dovrar las bunas ed imprender da las noschas.

## Diari our da vista d'ün mainascoula davart il temp da Corona

### Lündeschdi, 9 marz 2020

Eu dun cuntshaint a las persunas d'instrucziun la seguainta novità sülla plattform da comunicaziun Teams chi ha fat ün fich grond servezzan a nus tuots d'ürant las eivnas chi sun seguidas: Sco chi para uossa ter definitiv cumanzaina daman tuot normal cull'instrucziun. Trat attent als scolars a las masüras dal placat cotschen cha vo vezzaivat in tuot la chasa da scoula e cul linc survart (...). Daman illa sezzüda guardaina lura schi dà malsgürezza ed impustüt co agir schi vess dad ir amo ün pass inavant (...).

### Gövgia, 12 marz 2020

Consultond mincha di las medias electronicas s'haja surgni da di in di daplü il sentimaint chi pudess gnir a la situaziun cha scoulas gnian serradas. A mias collegas e meis collegas n'haja dat la seguainta in fuormaziun: Quist nu vessa mai cret ch'eu trametta üna jada, ma uossa n'haja listess decis da far quist. Quist valess a partir da subit. Scha vo vezzaivat amo alch chi's pudess cumpletter, a cas am fat a savair.

I's tratta d'ün documaint cun tscherts preparativs chi's pudess far schi gniss a la situaziun chi gnissan serradas las scoulas, tanter oter da far tour a chasa als scolars plü bler material pussibel o eir dad instruir a scolaras e scolars ingio cha'ls magisters sgüran ils documaints e co far adöver da l'applicaziun da Teams.

### Venderdi, 13 marz 2020

Eu sun in büro sü Ftan pro mia collega Martina pervi da tuot ün'otra fatschenda. Nus savain chi'ns spetta üna decisiun dal Cussagl federal ed eschan adüna plü persvas chi gnia decis chi gnian serradas las scoulas. Tras videochat pigliaina sü contact cun tuot noss collegas manaders e fixain provisoricamaing üna sezzüda d'urgenza a las 17.00, pel cas cha la decisiun füss propcha uschea.

Paca pezza plü tard segua la seguainta comunicaziun dal Departamaint d'educaziun: Tut las scolas popularas dal chantun Grischun vegnan serradas a partir dals 16 da mars 2020, 06.00 uras fin ad interim. Per la perioda dals 16 da mars 2020 fin ils 30 da mars 2020 na datti nagins pensums per




las scolaras ed ils scolar. Surtut n'è betg previs "distance-learning" durant quest temp.

Illa sezzüda cumünai vla dals 5 mainascoulas da nos cumün discutaina differentas tematicas, barattain ideas co proseguir in chosa e guardar ingio chi fa sen dad agir tuot il cumün listess ed ingio chi'd es meglder da chattar soluziuns adattadas pell'aigna scoula. Co orientaina als genituors, che sun ils prossems pass cha nus fain cun nos team da magisters e cura gnina darcheu insembel per decider davart ils prossems pass? Nus eschan fich grats cha'l Departamaint d'educaziun ha dat temp per reglar da maniera persistenta las proschas eivnas e dat ün temp da preparaziun e scolaziun da duos eivnas e na simplamaing trat üna decisiun na ponderada.

#### Sonda e dumengia, 14 e 15 marz 2020

I segua üna fin d'eivna turbulenta: respunder dumondas a cussagl da scoula e genituors perche cha'l Departamaint d'educaziun haja trat quistas masüras, sclerir dumondas avertas cun l'inspectorat chi'ns ha sustgnü cun üna hotline davent dal prüm minut, gnü differentes contacts cun oters mainascoulas da l'Engiadina per avair amo oters maniamaints e per ans sustgnair vicendaivelmaing e reglar la chüra d'uffants d'urgenza pella prosmeivna. I sun eir gnüdas singulas dumondas davart da la pressa ed impustüt d'eira important da preparar la sezzüda d'urgenza culs differentes teams da personas d'instrucziun per definir ils prossems pass. Lündeschdi, 16 marz 2020 e prossem temp Illa sezzüda da tuot il team in sala cumünala cun distanzunas tanter minchün regna pro tuots üna tscherta nervusità e minchün ha fingià fat seis impissamaints co chi pudess ir inavant tenor seis avis. Vaira svelta as sun però tuots consciaints cha'l temp da Corona sarà ün temp cun bleras surpraisas e na planisabel a lunga vista e chi va be schi vain trat da tuots vi da listessa sua. E lura ha cumanzà propcha üna collavuraziun exemplarica. Per parts haja gnü nom preparar material per dar a chasa als scolar, oters han preparà scolaziuns d'informatica o cussagls cun pits-



chat adüna darcheu novs impuls dad üna o tschella persuna d'instrucziun. Eir in nos inscunter virtual tanter da mainascoulas da la gövgia doda las listessas infuormaziuns dals collegas.

#### Venerdì, 17 avrigl 2020

Ils 29 d'avrigl vul il Cussegl federal decider definitivamain davart l'avertura da las scolas. Ulteriuras prescripziuns da basa vegnan spetgadas da la Conferenza svizra dals directurs chantunals da l'educaziun publica (CDEP), per uschia garantir in agir coordinà en tut ils chantuns. Tuot chi s'allegra da quista decisiun. I dà però diversas dumondas avertas: suot che circumstanzas sarà quai pussibel? Daja üna seguonda uonda da cas cun Covid-19? Düraran las masüras specialas amo lönch o poja il plü tard cul cumanzamaint dal nov on da scoula gnir instrui sainza restricziuns? Il temp da Corona es stat pellas scoulas ün temp fich intensiv e fich special. Las experienzas cha tuot nos team e tuot nossas scolaras e noss scolar han fat d'urgenza durant quist temp restaran in algordanza durant tuot la vita. Nus vain badà üna jada dapli quant importanta cha tuot la digitalisaziun es ed eschan fich grats d'avair gnü fich bunas pussibilitats electronicas durant quist temp, quai impustüt grazcha a l'iniziativa da MiaEngiadina e'l cumün da Scuol chi ha pussibilità da realisar tuot. Grond plaschair ans ha però eir fat tuot il sustegn cha nus mainascoulas e personas d'instrucziun vain gnü durant quist temp, saja quai da la politica cumünala e chantunala, da l'inspectorat, da las pedellas e dals pedels, dals uffants ed eir dals genituors chi nun han gnü ün temp uschè simpel.

Grazcha a tuots in nom dal team da mainascoulas

Mario Rauch



## Corona e cussagl da scoula

I nu dà üna fatschenda chi ha toc la scoula cun sias personas d'instrucziun, culs uffants ed ils genituors uschè ferm sco il virus da corona i'ls ultims ons. E da tschella vart nu daja üna fatschenda chi ha per sia importanza occupà il cussagl da scoula uschè pac. Vis da meis punct da vista stögla dir – per furtüna.

Eu m'aljord cha no d'eiran in discussiun in gövgia, ils 27 da favrer, ün pèr dis davu chi d'eira gnü desdit il maraton engiadinais, co cha no pudessan far il Chalandumarz per tour resguard a la pandemia chi paraiva da rivar planet eir in Engiadina. E lura esa i fich svelta. In venerdì, ils 28 da favrer ha la regiun annullà officialmaing ils Chalandumarzs in Engiadina Bassa. Quella decisiun ha fat mal a no tuots – però eu sun cuntaintschma cha quella decisiun es gnüda tratta d'ün'instanza plü ota e per tuots istess.

No speravan amo cha davu las vacanzas da Chalandumarz as balcha dal sgüra la situaziun, ma oha! Tuot es i amo plü svelta e las proschas decisiuns nu sun plü gnüdas trattas ne da no sco cussagl da scoula, ne da la regiun, ne dal Chantun d'impersè directamaing da la Confederaziun. Uschè vain tuots in Svizra stuvü seguir a quellas directives. Ed in ün duos trais haja gnü nom serrar las scoulas. Sco dit per furtüna nun ha il cussagl da scoula gnü da trar simlas decisiuns.

Ma schi che fa il cussagl da scoula in uschè üna situaziun – decis vegna da sura e realisar las masüras sto la part operativa da la scoula. Tenor mai d'eira nossa lezcha la plü importanta in quist temp da sustegner, motivar ed impustüt dar man liber als manaders ed a las manadras da scoula ed a tuots las personas d'instrucziun.

In quist lö lessa amo üna jada ingrazchar a tuots per la gronda lavur chi'd es gnüda prestada per instruir sün distanza a tuot ils scolar e tuot las scolaras da nossas fracziuns. Dir grazcha lessa eir al cumün chi ha avant pacs ons investi ill'infrastructura digitala chi d'eira da grondischma valur in quist temp. Dir grazcha lessa però eir a tuot ils genituors pel sustegn e l'incletta.

No tuots vain imprais üna pruna!

Pel cussagl da scoula Anna Mathis

## genituors

### intervistas

#### Es quai stantus dad avair a chasa ils uffants tuott'eivna?

Id es ün müdamaint chi douvra substanza e minchatant esa forse eir ün pa stantus. Il prüm esa i bain, ma planet esa da trar consequenzas chi nu plaschan adüna uschè bain als uffants. Ma no vain giovà bler cun els ed uossa sana eir ir bainin cul velo e no d'eiran bler a chaminar, simplamaing ad ajer frais-ch.

#### Che faivat tuot culs uffants d'urgenza ün di?

A bunura faina las lezchas cha la scoula ha dat e fain amo ün pèr exercizis implü. Davo hana da güdar a rumir e far uorden e lura daja gantar. Davo gantar faina tuots insembel ün pa la posa. E davomezdi giaina simplamaing ün pa oura.

#### Daja alch positiv, uossa in quista situaziun?

Positiv es forse, cha tuot s'ha ralentà. Il viagiari p.ex. es uschè restret, cha eir las emissiuns dals autos o aviuns sun idas inavo. Forse as poja tour alch our da quistas experienzas eir in l'avegnir.

#### Co chatta Ella quista metoda da far scoula sur l'internet?

A mai para quai fich bun. I dependa forse eir da l'età dal scolar. Eu sun però sgüra chi's po eir profiter da tuot quistas experienzas culs mezs electronics sco eir da lavurar independentamaing. I funcziuna eir tuot fich bain.

#### Che avantags o dischavantags han Els tras quista situaziun?

Duos avantags sun, cha la natüra as po re-crear ed ils umans (impustüt famiglias) han darcheu üna jada temp per passantar insembel. Dischavantags: Ils umans sun isolats ed i dà blers morts.

#### Che sfidas porta il corona i'l minchadi?

Üna gronda sfida per no es ch'eu nu poss lavurar, dimena nun haja ingüna paja.

#### Che sfidas porta il minchadi daspö il corona?

Mia plü gronda sfida es statta da chattar dad ün di sün tschel üna nouva chüra per meis uffant da duos ons. La mamma da di chi guardaiva trais dis l'eivna nun ha plü pudü lavurar, perquai ch'ella es illa gruppa da ris-ch.

Ün di l'eivna d'eira la chüra pro mia mamma chi tocca eir pro la gruppa da ris-ch. Dimena n'haja stuvü organisar in prüma lingia ün'otra soluziun a regard la chüra. Eu n'ha chat-tà piazza illa Canorta per ün di l'eivna. Dal rest lavura i'l „Homeoffice“ e stoss al listess müdamaint verer dals uffants. Quai es üna fich gronda sfida. Eir l'esser tuotta pezza tuots ün sün tschel – eu e meis duos uffants – maina schon minchatant a situaziuns cun tensiuns.

#### Che sfidas maina quista situaziun cul virus da corona?

Sfidas personalas, tanter pèr, famiglias chi nu's vezzan plü, ma eir per las scoulas e tuots ils affars serrats es quai ün fich greiv temp. I dà ferm da stübgjar quant svelta cha'l virus s'ha derasà e che effet mundial chi ha dat.

#### Co es il minchadi?

Davo chi s'ha adüsà ün pa vi da la situaziun funcziuna dret bain. Id es per tuots ün oter möd da viver – scoula e lavur. Dad üna vart es tuot plü pachific e da tschella vart daja bleras discussiuns e pissers.

#### Che es il greiv d'urgenza quist temp?

Dad esser consequaint e che chi'm dà da pensar es chi dà personas chi nu's tegnan vi da las directives.

#### Daja roba positiva in quista situaziun?

Schi, blera! Id es tuot ün pa plü tranquil e plü regional, i's va plütost illas butias pitschnas a cumprar aint. I's stübgja che chi's douvra propcha per esser cuntaint e per viver...

#### Che es bun vi dal homeschooling?

Cha'ls uffants impredan ad esser plü independents e chi impredan ad ir intuorn cullas medias. Forse as profita eir davopro da quist möd da far scoula 'digitala', ma i nu rimplazza mai il contact personal.

#### Co es quai per Els da nu pudair s'inscuntrar cun glied?

Il prüm temp giodaiva la calma e da pudair far bleras robas be per mai, però uossa davu tant temp es quai alch chi'm manca fich. Eu bram da gnir insembel cun glied per far musica, per discuter o be per baiver ün café. La distanza tanter la glied am fa impreschiun e minchatant eir ün zich temma.



**Quistas scolaras e quists scolars bandunan davò 9 ons nossas scoulas.  
Per l'avegnir tils giavüschaina tuot il bun!**



**Adrian Stuppan**  
paur



**Alan Kalo**  
10avel on da scoula



**Alessio Ferreira Sousa**  
10avel on da scoula



**Alexander Zanetti**  
giarsunadi da commerzi



**Antea Tönett**  
scoula media specialisada



**Bianca Cerqueira Ferreira**  
giarsunadi da commerzi



**Cedric Schlatter**  
tecniker da recloma



**Claudio Regli**  
falegnam



**Cyril Vital**  
scoula media specialisada



**Dennis Morell**  
bos-cher



**Flurin Alesch Felix**  
falegnam



**Jon Francisco Marques Felix**  
electricer



**Laila Beluli**  
specialista d'hotel  
e comunicaziun



**Lara Fabiana Quintela Silva**  
giarsunadi da commerzi



**Lara Sofia Da Silva Marques**  
10avel on da scoula



**Lea Cantieni**  
mechatronicra da camius



**Lorena Nuotclà**  
scoula media specialisada



**Luca De Oliveira Pereira**  
disegnadur da  
construcziun bassa




**Mattia Rotiroti**  
10avel on da scoula



**Men Noggler**  
bos-cher



**Nicki Bonorand**  
assistenta da veterinari



**Nico Angerer**  
specialist d'assistenza (FaGe)



**Nikol Berakovic**  
detaillista



**Ricardo Lopes Rodrigues**  
mecaniker



**Samira Garcia**  
detaillista



**Sandra Schmidt**  
educatura d'uffants (FaBe)



**Severin Guler**  
informatiker



**Silvan Lüscher**  
bos-cher



**Ana Dos Santos Alves**  
assistenta da veterinari